

Fletëpalosje për kujdestarët në çështjet familjare

I. Këshilla dhe informacione të përgjithshme

Me marrjen e kujdestarisë së pjesshme¹ ju përmbushni një detyrim qytetar të rëndësishëm. Ju merrni përsipër një detyrë vullnetare, të cilën duhet ta kryeni me ndërgjegje dhe përgjegjësi dhe vetëm në interes të personit, që është nën kujdestarinë tuaj.

Dispozitat ligjore në lidhje me kujdestarinë e pjesshme janë të përcaktuara në Kodin Civil (nenet 1776, 1777, 1809 deri 1813).

Në përputhje me nenin 1813 të Kodit Civil gjejnë përdorim gjithashtu dispozitat ligjore mbi kujdestarinë ligjore (nenet 1773 deri 1808 të Kodit Civil). Është e këshillueshme të informoheni rreth këtyre dispozitave.

Gjykata për Çështjet Familjare mbikqyr veprimtarinë tuaj dhe ju këshillon lidhur me të gjitha pyetjet që kanë të bëjnë me detyrën tuaj.

Nëse ju kërkohet, jeni të detyruar të informoni Gjykatën për Çështjet Familjare mbi ushtrimin e detyrës suaj.

Ju jeni përgjegjës për dëmet, që mund t'i shkaktohen personit, i cili ndodhet nën kujdestarinë tuaj, si rrjedhojë e shkeljes së detyrimeve dhe përgjegjësive nga ana juaj, sidomos në rastin kur neglizhoni të kërkonti pagesën e alimenteve apo plotësimin e detyrimeve të tjera ndaj personit për të cilin kujdeseni. Ndaj këtij rreziku mund të siguroheni – informacione të mëtejshme mund të gjeni pranë Gjykatës për Çështjet Familjare.

Para të personit të kujdesur, që kërkohen për shpenzimet e tij (Para në dispozicion) duhet të mbahen në një llogari të personit të kujdesur tek një institucion krediti. Para të personit të kujdesur, që nuk kërkohet si para në dispozicion, duhet të investohen (Para investimi), në një llogari të personit të kujdesur tek një institucion krediti të përshtatshëm për investimet me tarifë interesi (Llogari investimi). Institucioni përkatës i kredisë duhet t'i përkasë një institucioni të sigurisë që është i mjaftueshëm për investimin përkatës. Leja e gjykatës familjare kërkohet për një lloj tjetër investimesh.

II. Vetëm për kujdestarinë e pjesshme që mbron interesat financiare të fëmijës ndaj prindit (pagimin e alimenteve)

Duhet të keni parasysh këshillat dhe informacionet e mëposhtme:

1. Detyra juaj është në rradhë të parë të kujdeseni që prindi, i cili ka detyrime financiare ndaj fëmijës (pagesa e alimenteve) t'i shlyejë ato. Për këtë fillimisht mund t'i bëni prindit kërkesë më shkrim. Dispozitat ligjore lidhur me detyrimet financiare të prindërve ndaj fëmijëve janë të përfshira në nenet 1601 deri 1615 të Kodit Civil.

¹ „Vormundschaft“ dhe „Pflegschaft“ janë të dyja forma të kujdestarisë, e cila i kalon një personi të tretë kur prindërve u hiqet me vendim gjyqi përgjegjësia prindërore. Në rastin e parë prindërve u hiqet plotësisht dhe kundër dëshirës së tyre përgjegjësia prindërore. Në rastin e dytë prindërve u hiqet përgjegjësia prindërore pjesërisht ose me dëshirën e tyre. Për t'i dalluar këto dy forma nga njëra-tjetra në vazhdim do të përdoret termi „kujdestari ligjore“ për të parën dhe „kujdestari e pjesshme“ për të dytën. Personi që e ushtron këtë detyrë do të quhet në të dyja rastet „kujdestar/e“ [Shënim i përkthyeses].

Shuma e këtyre detyrimeve financiare varet nga situata sociale dhe financiare e fëmijës në nevojë dhe përfshin në përgjithësi të gjitha nevojat e fëmijës për të jetuar, gjithashtu edhe shpenzimet për edukim dhe shkollim. Pra ligji nuk përcakton një shumë të caktuar. Prindi që ka detyrimin financiar është i detyruar të paguajë për fëmijën edhe atëherë, kur për këtë arsye ndikohet negativisht situata e tij financiare. Në këtë rast ai është i detyruar të përdorë të gjitha mjetet dhe mënyrat për të siguruar në të njëjtën masë jetesën e tij dhe të fëmijës së tij. Pra shuma që duhet t'i paguhet fëmijës nga prindi varet nga të ardhurat e këtij të fundit.

2. Pagesat (alimentet) që hyjnë në llogari duhet të përdoren vetëm për personin që ndodhet nën kujdestarinë tuaj.
3. Nëse prindi, që është i detyruar të paguajë nuk ka dëshirë të përmbushë detyrimin e tij, ju – pasi t'i keni dërguar letër-kujtesën për kryerjen e pagesës – duhet të kërkoni në emër të personit për të cilin kujdeseni kryerjen e pagesës me vendim gjyqi. Për këtë qëllim duhet t'i drejtoheni Zyrës së Minorenëve apo Gjykatës së Shkallës së Parë, të cilat ju japin informacione të mëtejshme, por që nuk lejohet t'ju këshillojnë nga ana ligjore.

III. Përfundimi i kujdestarisë së pjesshme

Detyra juaj përfundon

- a) me heqjen e kujdestarisë nga gjykata familjare,
- b) në rastin e kujdestarisë së pjesshme për një person që ndodhet nën kujdesin e prindit apo të kujdestarit ligjor, me përfundimin e kujdesit prindëror apo të atij ligjor,
- c) për një kujdestari për një fëmijë të palindur me lindjen e fëmijës,
- d) në rastin e kujdestarisë së pjesshme lidhur me çështje të caktuara, me përfundimin e këtyre çështjeve.